

दिनांक 09.02.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- उपराष्ट्रपति जगदीप धनखड आज प्रदेश रा दौरा माथे रह्या-वणा काश्तकारां सूं आप रा उत्पादा ने व्यापार सूं जोडबा अर सहकारिता रो फायदो लेबा ने कह्या।
- प्रयागराज महाकुम्भ मांय हाल ताई 40 करोड़ सूं बत्ता सिरधालू डुबकी लगाई-राष्ट्रपति द्रौपदी मुर्मू रो काल महाकुम्भ मांय पवित्र स्नान रो कार्यक्रम।
- प्रधानमंत्री नरेन्द्र मोदी काल **परीक्षा पे चर्चा** कार्यक्रम मांय पढ़नियां सूं बातचीत करेला।
- जयपुर मांय आज सूं **भारत रंग महोत्सव** री शुरूआत-पांच देशां रा कलाकारां री नाट्य प्रस्तुति व्हेला।

000

उपराष्ट्रपति जगदीप धनखड आज प्रदेश रा दौरा माथे रह्या। श्री धनखड चित्तौडगढ़ रा मातृ कुण्डिया मांय राख्या कार्यक्रम ने सम्बोधित कर्या। श्री धनखड कह्या के किसान देश रो अन्नदाता अर माली व्यवस्था री रीढ़ है। विकसित भारत रा लगस ने पूरा करबा मांय किसान री महताऊ भूमिका है। श्री धनखड कह्या के देश मांय सात सौ 30 सूं भी बत्ता किसान अनुसंधान केन्द्र है। किसानां ने आप रा हलका रा अनुसंधान केन्द्र माथे जरूर जाणो चाहिजे। उपराष्ट्रपति कह्या के किसानां ने सहकारिता रो फायदो लेता व्ह्या कृषि उत्पादन रे सागे आप रा जिनावरां री कानी ध्यान देणो चाहिजे अर आप रा उत्पादा ने व्यापार सूं जोडबा रे सागे मार्केटिंग माथे भी ध्यान देणो चाहिजे

उपराष्ट्रपति जगदीप धनखड उदयपुर मांय पैली रा विधानसभा अध्यक्ष कैलाश मेघवाल सूं मुलाकात कर वां रा स्वास्थ्य री जाणकारी ली।

000

लोकसभा अध्यक्ष ओम बिरला राजस्थान री भाजपा सरकार ने किसान हितैषी बतायो है। वे कह्या के राज्य सरकार काश्तकारां रा कल्याण खातर लगातार काम कर री है। श्री बिरला आज कोटा रा दशहरा मैदान मांय राख्या एक जळसा ने सम्बोधित कर रह्या हा। वे कह्या के काश्तकारां रा हालात बदलबा सूं ई देश रो सही मायनां मांय विकास व्हेला। श्री बिरला काश्तकारां सूं कृषि उत्पादन बढ़ाबा अर नवाचार करबा ने कह्या।

कार्यक्रम ने सम्बोधित करता थकां मुख्यमंत्री भजन लाल शर्मा कह्या के राज्य सरकार समाज रा आखिरी छोर रा लोगां रो जीवन बेहतर करबा खातर प्रतिबद्ध है। वण कह्या के इण बदलाव सूं प्रदेश री तरक्की व्हेला।

0000

प्रयागराज महाकुंभ मांय हाल ताई 40 करोड सूं बत्ता सिरधालू आस्था री डुबकी लगा चुक्या है। प्रयागराज मांय मकर संक्रांति, मौनी अमावस्या अर बसंत पंचमी माथे तीन अमृत स्नान रे पाछे भी सिरधालूआं मांय घणो उच्छाव है। 13 जनवरी सूं सरू व्ह्यो महाकुंभ 26 फरवरी ताई चालेला। इण बीच महाकुंभ मेळा मांय जल जीवन मिशन मंडप, लोगां रा आकर्षण रो केन्द्र बणयोडो है। इण पवेलियन मांय गांवाई जीवन माथे इण मिशन रो असर दिखायो जा रह्यो है। देश रा गांवाई इलाकां मांय आ रह्या बदलाव ने भी प्रदर्शनी मांय दिखायो जा रह्यो है। राष्ट्रपति द्रौपदी मुर्मू काल प्रयागराज महाकुंभ मांय जावेला। वे गंगा, यमुना अर सरस्वती रा त्रिवेणी संगम मांय पवित्र डुबकी लगावेला। राष्ट्रपति अक्षयवट अर हनुमान मंदिर रा भी दर्शन करेला। वे डिजिटल महाकुंभ केंद्र मांय आधुनिक तकनीक रे जरिये महाकुंभ री बत्ती जाणकारी लेवेला।

000

प्रधानमंत्री नरेन्द्र मोदी काल **परीक्षा पे चर्चा** कार्यक्रम रे तैत पढ़नियां सूं बातचीत करेला। यो कार्यक्रम नई दिल्ली रा भारत मण्डप मांय राख्यो जावेला। शिक्षा मंत्रालय रे मुजब इण कार्यक्रम मांय हर एक राज्य अर केंद्र शासित प्रदेश सूं 36 पढ़नियां रो चुणाव न्यारा-न्यारा स्कूलां सूं कर्यो गयो है। कार्यक्रम रो सीधो प्रसारण दूरदर्शन, प्रधानमंत्री कार्यालय रा यूट्यूब चैनल अर शिक्षा अर सूचना अर प्रसारण मंत्रालय रा सोशल मीडिया चैनलां माथे कर्यो जावेला। परीक्षा पे चर्चा आपसी बातचीत रो कार्यक्रम है। इण मांय प्रधानमंत्री मोदी छात्र-छात्रावां ने परीक्षा री तैयारी, तनाव प्रबंधन अर व्यक्तित्व विकास समेत दूजा विषयां रो मार्गदर्शन देवे है। अठिने प्रदेश मांय भी कार्यक्रम ने ले र विद्यार्थियां मांय खासो उच्छाव है। कोटपूतली-बहरोड रा जवाहर नवोदय विद्यालय पावटा री छात्रा मोनिका चौधरी अर रीना बतायो के इण कार्यक्रम सूं म्हाने परीक्षा री टेम बेहतर करबा री सीख मिले है। जवाहर नवोदय विद्यालय पावटा रा अध्यापक के.डी. मीणा अर प्रेमचंद सैनी बताया के प्रधानमंत्री कानी ऊं परीक्षा पे चर्चा कार्यक्रम ने पढ़नियां खातर चोखो कदम बतायो ।

000

केन्द्रीय वन अर पर्यावरण मंत्री भूपेन्द्र यादव आज कोटपुतली-बहरोड रा दौरा माथे रह्या। बणा बानसूर रा माजरा अहीर गांव मांय शहीद सूबेदार गिर्राज प्रसाद यादव रा घरआळा सूं मुलाकात करी। इण दौरान वणा हलका रा विकास सूं जुड़्या न्यारा-न्यारा मुद्दा माथे गांवा वाळां सूं बातचीत करी।

000

उपमुख्यमंत्री प्रेमचन्द बैरवा आज पाली ज़िला रा सोजत मांय राख्या प्रतिभा सम्मान समारोह मांय भाग लीना। इण मौके श्री बैरवा तीन सौ प्रतिभावान छात्र-छात्रावां अर न्यारा-न्यारा हलका मांय चोखो काम करबा वाळी हस्तियां रो सम्मान कर्या। श्री बैरवा आप रा सम्बोधन मांय युवा प्रतिभावां सूं देश रा विकास मांय योगदान देबा ने कह्या। वे कह्या के शिक्षा रे सागे संस्कार भी जरूरी हैं। नुवी पीढ़ी ने संस्कारवान बणणो चाहिजे। इण सूं पैली उप-मुख्यमंत्री ज़िला रा रायपुर मांय जणसुणवाई भी कीनी।

000

झालावाड़ ज़िला रा गांवाई हलका मांय आ दिनां रबि री फसल परवान माथे है। खेत धनिया, गेहूं, चना, सरसों, मेंथी, मसूर अर दूजी फसलां सूं लहलहाता निजर आ रह्या है। म्हाका खबरनवीस बताया के झालावाड़ आ दिनां धनिया री खुशबू सूं महक रह्यो है।

000

जयपुर मांय आज सूं **भारत रंग महोत्सव** सरू व्ह्यो। पांच दिन ताई चालवा वाळां इण थियेटर फेस्टिवल मांय स्पेन, इटली, ताईवान अर चैक रिपब्लिक सूं आया कलाकारां री नाट्य प्रस्तुति व्हेला। महोत्सव रा पैला दिन आज नॉर्वे रा रंगकर्मी **द रोज़** नाटक रो मंचन कर रह्या है। यो

रंग महोत्सव संस्कृति मंत्रालय अर राष्ट्रीय नाट्य विद्यालय री कानी ऊं राजस्थान इन्टरनेशन सेंटर मांय कर्यो जा रह्यो है। एन.एस.डी. रा निदेशक चितरंजन त्रिपाठी बताया के एक रंग-श्रेष्ठ रंग ने अपनाता थकां इण रो आयोजन कर्यो जा रह्यो है। वे कह्या के रंगमंच सगळां लोगां ने जोड़े है। इण रे सागे ई रंगमंच रचनात्मकता उत्कृष्टता अर एकता रो उत्सव मनावे है।

000

स्वर्ण नगरी जैसलमेर मांय आज सूं मरु महोत्सव सरु व्हयो। महोत्सव री सरुआत पोकरण रा महादेव मन्दिर मांय पूजा-अर्चना अर शोभा यात्रा रे सागे व्ही। महोत्सव मांय दूजा कार्यक्रमों रे सागे मिस पोकरण होड़ राखी गयी। वठिने साफा बांधो अर रस्साकशी री होड़ प्रतिभागियां अर दर्शकां रो मन मोह लीनो

000

भरतपुर मांय आ दिना फ्लॉवर शो चाल रह्यो है। विश्वप्रिय शास्त्री पार्क मांय चाल रह्या इण शो मांय करीब 200 प्रजातियां रा 10 हजार सूं बत्ता फूलां री प्रदर्शनी लगाई गई है। इण मांय सजावटी, सब्जी, मसाला रा पौधा रे अलावा औषधीय पौधा भी शामिल है। फूलां रे अलावा प्रदर्शनी मांय केई दुर्लभ जाति रा कैक्टस भी लगाया गया है। प्रदर्शनी ने देखबा खातर बड़ी संख्या मांय लोग पूग रह्या है। प्रदर्शनी मांय आज केई होड़ा भी व्ही।

000

38 वां राष्ट्रीय खेलां मांय राजस्थान रो दळ हाल तांई न्यारा-न्यारा मुकाबला मांय 31 पदक हासिल कर्यो है। इण मांय राजस्थान 7 सोना रा, 7 चांदी रा अर 17 कांस्य रा तमगा जीत्यो है। भारत अर इंग्लैंड रे बीच तीन एक दिवसीय क्रिकेट मैचां री श्रृंखला रो दूजो मैच आज ओड़िशा रा कटक मांय खेल्यो जा रह्यो है। इण मांय इंग्लैंड टॉस जीत र पैली बल्लेबाजी करता थकां 304 रण बणायो। थाईलैंड मांय चाल रह्या पैरा-तीरंदाजी एशिया कप मांय भारतीय पैरा-तीरंदाज आज रिकवर ओपन अर कंपाउंड ओपन मिक्स्ड टीम होड़ां मांय दो बत्ता सोना तमगा जीत्या है। इण रे सागे ई भारत हाल तांई चार सोना रा अर दो चांदी रा पदक समेत कुल 6 पदक जीत चुक्यो है।

000